



TOSHKENT DAVLAT YURIDIK UNIVERSITETI REKTORINING B U Y R U G ' I

16.04.2024

239-tm-son

Talabaga hayfsan e'lon qilish to'g'risida

Bugungi kunda universitetda yuqori malakali yuridik kadrlarni tayyorlash maqsadida talabalarni ma'naviy-axloqiy tarbiyalash, ularning huquqiy madaniyati va ongini oshirish bo'yicha samarali tizimni yaratish, ularda yuksak ma'naviy-axloqiy fazilatlarni shakllantirish hamda rivojlantirish maqsadida bir qator kompleks chora-tadbirlar amalga oshirilmoqda.

Shunga qaramasdan ayrim talabalar tomonidan universitet faoliyati haqida noto'g'ri munosabat, fikr-mulohaza shakllanishiga, universitet obro'siga, universitetda yaratilayotgan ochiq-oshkoralik siyosatiga zarar yetkazadigan qasddan harakatlar qilinib, universitet Odob-axloq kodeksida belgilangan me'yorlarni buzish holatlari kuzatilmoqda.

Jumladan, Magistratura va sirtqi ta'lim fakulteti sirtqi ta'lim shakli 2-kurs A potok 3-guruh talabasi Maxkamov Shohzod Potixjon o'g'li tomonidan 2023/2024 o'quv yili kuzgi semestri yakuniy nazorat natijalari asosida Fuqarolik huquqiga kirish modulidan apellyatsiya shikoyati quyidagi mazmunda bayon qilingan: *"Avvalombor savollarni yaxshilab o'qib chiqish kerak. Ustoz bergan bilimga yarasha yakuniy javoblarni yozdim. Demak, ustozni bilimi ham "0" ga teng ekan. Yakuniy kazuslarni charchagan holda tekshirish kerak emas. Javoblarni fikr hayolni joyga qo'yib o'qish kerak. Tabiat qo'yniga chiqib dam olib kelsangiz miya hujayralaringizga va yon atrofdagi odamlarga foydasi bo'ladi. Balkim, universitetda ustozlarning e'tiboriga tushib intensivga rosa qolgan bo'lsangiz kerak. Alamingizni kelajagi bor avloddan olishingiz, sizni qanday inson ekanligingizdan darak beradi. Siz "0" ga teng odamsiz. Talabaning xatti-harakatlarini mensimasligiz, sizni qanday insonligizdan xabardor bo'ldim. Umuman tekshirmang yakuniylarni. Qancha qiynalgan oilalarga zarar keltirasiz. Sizni qo'ygan bahoyingiz va fikr bildirishingiz insoniyat olamiga zarar keltiradi. Tabiat qo'yniga chiqib dam olib kelish esizdan chiqmasin. Oniks. Shunday ustozlar universitetda ishlashi universitet obro'sini to'kadi. Universitetdan ketsez agar talabalar xursandligidan elga osh bersa kerak".*

Ushbu mazmundagi apellyatsiya shikoyati yuzasidan, 2024-yil 14-mart kuni

Fuqarolik huquqi kafedrası mudiri N.Imomov tomonidan Magistratura va sirtqi ta'lim fakulteti dekani nomiga bildirgi bilan murojaat qilingan. Bildirgida talaba Maxkamov Shohzod Potixjon o'g'li tomonidan 2023/2024 o'quv yili kuzgi semestrda o'tilgan Fuqarolik huquqiga kirish moduli doirasida yozilgan yakuniy nazorat ishi yuzasidan berilgan apellyatsiya shikoyatida ma'ruza, seminar mashg'ulotlarini olib borgan va yakuniy nazorat ishini tekshirgan professor-o'qituvchilarni haqoratlab, ularning sha'niga tegadigan fikrlar bildirilganligi keltirib o'tilgan.

Bundan tashqari, Sh.Maxkamov tomonidan 2022/2023 o'quv yilida ham Xorijiy tillar kafedrası o'qituvchisi M.Rasulova va Fuqarolik huquqi kafedrası o'qituvchisi S.Tojiboyevlarga nisbatan seminar darsi vaqtida o'qituvchining sha'ni va qadr-qimmatini kamsituvchi fikrlar bilan baland ohangda baqirib, o'qituvchi bilan tortishish holatlari yuzasidan Magistratura va sirtqi ta'lim fakulteti dekanatiga yozma va og'zaki tarzda bildirgi kiritilgan.

Maxkamov Shohzod Potixjon o'g'li Universitet Odob-axloq komissiyasining 2024-yil 2-aprel kungi yig'ilishida haqiqatda 2022/2023 o'quv yilida Xorijiy tillar kafedrası o'qituvchisi M.Rasulova va Fuqarolik huquqi kafedrası o'qituvchisi S.Tojiboyevlarni, shuningdek 2023/2024 o'quv yili kuzgi semestrda o'tilgan Fuqarolik huquqiga kirish modulidan yakuniy nazorat ishi natijalari yuzasidan yozilgan apellyatsiya shikoyatida Fuqarolik huquqi kafedrasining ma'ruza, seminar mashg'ulotlarini olib borgan va yakuniy nazorat ishini tekshirgan professor-o'qituvchilarni haqoratlab, ularning sha'niga tegadigan fikrlar bildirganligini tan olib ko'rsatuv bergan, shuningdek bu xususida fakultet dekanatiga ham yozma tarzda tushuntirish xati yozib bergan.

Talaba Maxkamov Shohzod Potixjon o'g'li o'zining yuqoridagi xatti-harakatlari bilan "Oliy ta'lim to'g'risida"gi nizomning (ro'yxat raqami 1222, 2003-yil 22-fevral) 43-bandi hamda Toshkent davlat yuridik universiteti Odob-axloq kodeksi 15-moddasining ikkinchi xatboshisi (o'z harakatlari bilan Universitet imijini saqlash va oshirish, Universitet, uning xodimlari, talabalari va doktorantlari nomi va manfaatlariga asossiz ravishda ziyon yetkazadigan harakatlarni amalga oshirmaslik, shuningdek ular bilan muloqot qilganda hamda jamoat oldida, ommaviy axborot vositalari, Internet, ijtimoiy tarmoq va messenjerlardagi chiqish va yozishmalarida o'zlarining namunali xulq-atvori bilan Universitet haqida yuksak ijobiy taasurol uyg'otish), 17-moddasining ikkinchi xatboshisi (har qanday huquqbuzarlik yoki jinoyat sodir etish, jumladan tuhmat qilish, haqoratlash), 17-moddasining to'rtinchi xatboshisi (tinchlik yoki osoyishtalikka qarshi tajovuz qilish, janjallashish), 18-moddasining birinchi xatboshisi (xodim, talaba va doktorantlarning o'zaro munosabatlari milliy qadriyat va an'analar, yagona jamoaviy muhit, o'zaro hurmat va e'tibor, do'stlik, hamjihatlik, halollik va adolat tamoyillariga asoslanishi lozim), 18-moddasining ikkinchi xatboshisi (xodim, talaba va doktorantlarning o'zaro munosabatlarida inson qadr-qimmatiga hurmatsizlik, shaxsiyatni kamsitish, qo'pollik, behayo so'zlar ishlatish, mushtlashish qat'iyon man etiladi), 26-moddasining to'rtinchi xatboshisi (odob-

axloqqa oid milliy an'analarimiz, urf-odat va qadriyatlarimizni hurmat qilish)da belgilangan qoidalarni qo'pol ravishda buzgan.

Yuqoridagilarni inobatga olib, Oliy ta'lim to'g'risidagi nizom (ro'yxat raqami 1222, 2003-yil 22-fevral) va Universitet Ichki tartib qoidalarining 83-bandiga asosan, shuningdek universitet Odob-axloq komissiyasining 2024-yil 2-apreldagi 36-son yig'ilish bayoniga muvofiq,

BUYURAMAN:

1. Toshkent davlat yuridik universiteti Odob-axloq komissiyasining 2024-yil 2-apreldagi 36-son yig'ilish bayoni ma'lumot va ijro uchun qabul qilinsin.

2. Magistratura va sirtqi ta'lim fakulteti sirtqi ta'lim shakli 2-kurs A potok 3-guruh talabasi Maxkamov Shohzod Potixjon o'g'liga hayfsan e'lon qilinsin.

3. Magistratura va sirtqi ta'lim fakulteti dekani A.Babadjanov:
mazkur buyruq mazmun-mohiyatini talabalar e'tiboriga etkazsin va tegishli tushuntirish ishlarini olib borsin;

talabaning shaxsiy hujjatlar yig'majildiga buyruq nusxasi tikilishini ta'minlasin.

4. Mazkur buyruq bajarilishini nazorat qilish Yoshlar masalalari va ma'naviy-ma'rifiy ishlar bo'yicha birinchi prorektor A.Xashimhonov zimmasiga yuklansin.

Rektor v.v.b.



I.RUSTAMBEKOV

Toshkent shahar

Kiritildi:

Dekan (Fan nomzodi yoki falsafa
doktori (Ph.D) ilmiy darajasiga yoki
xorijiy davlatlarning unga
tenglashtirilgan boshqa ilmiy
darajalariga yoki dotsent ilmiy
unvoniga ega bo'lgan)

A.BABADJANOV

**Kelishildi:**

Yoshlar masalalari va ma'naviy-
ma'rifiy ishlar bo'yicha birinchi
prorektor

A.XASHIMHONOV



Direktor

SH.PO'LOTOV



Katta yuriskonsult

A.TURSUNOV

